

四庫全書

史部

欽定四庫全書

史部

明名臣琬琰錄卷三

一至

詳校官侍講_臣陳萬青

刑部郎中_臣許兆椿覆勘

總校官編修_臣王燕緒

校對官待詔_臣胡士震

謄錄監生_臣李從亨

欽定四庫全書

史部七

明名臣琬琰錄

傳記類三 總錄之屬

提要

臣等謹案明名臣琬琰錄二十四卷續錄二

十二卷明徐紘編紘字朝文武進人弘治庚

戌進士以刑部郎出為廣東按察司僉事分

巡嶺東終於雲南按察司副使是書乃仿宋

杜大珪碑名臣碑傳琬琰集而作所輯自洪

武迄弘治九朝諸臣事蹟前錄所載一百十
有七人續錄所載九十五人凡碑銘誌傳以
及地志言行錄之類悉具焉其中如李景隆
之喪師誤國不得謂之名臣惠安伯張昇在
戚里中雖有賢聲而始終未嘗任事亦難與
勲臣並列又如陳泰墓誌中稱寇深忌其才
名嗾人誣劾而李賢所作深墓志亦在錄中
乃極稱其持法嚴明雖自附識語調停究不

免彼此矛盾然明自成弘以前風會淳厚士大夫之秉筆者類多質直不支無緣飾夸大之詞尚屬可以取信且其中如郁新吳壽昌等凡數十人皆史傳所不詳考獻徵文亦足以資證據固非小說家言掇拾傳聞構虛無據者比也乾隆四十六年十月恭校上

總纂官

臣紀昀臣陸錫熊臣孫士毅

總校官
臣陸費墀

欽定四庫全書

明名臣琬琰錄卷一

明 徐紘 撰

太祖高皇帝御製中山武寧王神道碑

大明中山武寧王姓徐氏諱達鳳陽府鳳陽縣人家世
農業王年二十有二值元末兵興歲癸巳朕集義旅王
東麾下朕視其所以周旋幾二年動靜語默悉超羣英
於是命為帥首凡有徵征以代朕行又幾一載明年乙

未朕被敵所執敵之帥首亦為我軍所執明日王來以
身代朕歸朕歸縱敵帥首易王還己而從朕渡江下采
石定太平時機務浩繁姑孰之郡密邇大江况元帥首
曼濟哈雅率舟師以拒江面為朕肘腋之患不暇率兵
四征乃命王為將擇精兵數千東取溧水溧陽王兵至
守者不戰民庶咸安明年丙申春二月敗元舟師於采
石王仍屯溧水三月召王從征建業越十日庚寅師入
建業越七日丁酉命為大將浮江而下水陸並進東取

京口大破元師京口已定東探浙右時張士誠擅稱名號遣將已據毗陵旌旗相望其守者潛遣間諜誘我斥堠王察知遣使歸告請勒兵以討朕許之王將三萬人逼近其壘復遣歸告賊勢少窘益兵可下朕遣戰將千餘負甲士三萬師會合圍毗陵張士誠自姑蘇發其弟張九六將兵數萬來援王遣兵逆戰不移時破之生擒張九六城守猶堅朕復益新附二萬合勢共圍守者窘甚計出多方誘我新附者二萬新附帥首密從傾營入

城助彼來戰初我軍環其城而營之因新附者叛四
去其三獨王固守其南開平王猶營東南外一舍之餘
扼彼援兵尚未驚移間新附者叛寇迫王營王拒守且
戰開平自外來援內外夾攻大敗其衆擒其守將張德
餘軍敗入其城王復環而困之士誠自姑蘇遣將呂珍
黃夜入城督兵以守與王相抗初彼軍雖少糧且足用
戰守益堅及請降入軍多糧少戰且狐疑丁酉春守將
呂珍潛遁城下師旋復遣征寧國城圍援至王發兵扼

要而戰援者敗俘斬者衆旬日城降宣城亦附凱旋時
四方羣雄甚多朕固守江東數郡命王秣馬厲兵以觀
四方之勢又明年戊戌命王點兵固守建業朕親下淞
東金華既平二月師還未幾遣王西征皖城水陸並進
徼北秋命王西征池州師抵而平陳友諒遣兵來救斬
首萬級生獲三千餘時張士誠發兵來寇宜興城陷遣
王將兵復取師抵城下不旬日城復生獲三千餘皆戰
死其年惟楊元義兵盡歸壬寅秋王從朕下潯陽陳友

諒敗潰時張士誠發兵攻長興留王守潯陽未幾召歸師次中塗令復守潯陽比至陳兵已入城守王遣兵與戰陳兵復潰俘斬數千獲其眷屬戰騎彼時潯陽之境空荒棄而弗守師旋建業癸卯春正月取豫章城降命王西取武昌不克班師中塗豫章內變王復討平張士誠北寇壽春朕親往援王為前部張兵敗北旋師金斗周圍其城戰間陳友諒大率兵寇豫章詔王罷金斗之圍歸整舟師解豫章之難秋七月師次彭蠡陳友諒罷

圍逆戰王身先諸將敗陳一巨艘死者千五百人自是
彼軍勢弱我軍威振由王身先癸卯歲留王守京朕西
征武昌甲辰武昌下克陳之後其年大會兵於京師乙
巳歲命王取淮東淮陰諸州仲夏師旋歲丙午命率甲
士二十餘萬東取吳越鏖戰於吳興阜林之野生擒張
兵六萬不戮一卒盡赴京師冬十有一月師抵姑蘇明
年丁未秋九月姑蘇下兼浙左之大半詔班師命王西
略蒼梧九溪率服還軍京師洪武元年戊申春正月朕

即大位二月命王為征北大將軍銀青榮祿大夫上柱
國錄軍國重事中書左丞相兼太子少傅信國公命率
甲士二十五萬北定中原抵齊魯而民安所過輯兵守
禦規畫足食兵不民擾所得壯士帥而徂征不煩朕念
北齊既平命渡河南兵至大梁父老壺漿以迎西下洛
陽長驅峻函直抵潼關守者拒戰王命宋國公馮勝拔
之朕命據關而守諭歸大梁北下河內由鄴下趨趙州
抵臨清其年八月三日辛未北入元都捷奏平元復命

西下晉冀如命井陘長驅晉冀以平二年春正月召渡河西兵入關中守者皆棄全有關內之地召歸天下太平三年冬十有一月論功行賞命王為開國輔運推誠宣力武臣特進光祿大夫左柱國太傅中書右丞相征北大將軍改封魏國公五年夏五月眾議北入沙漠王至嶺北兵疵而還勅命沿邊輯守歲鎮於燕口外餘民自是收盡海內無虞十七年甲子太陰數犯上將朕惡之召罷北鎮勞之於家是年臘月二十有一日染疾朕

恐之星馳四召名醫咸至終疾勿瘳明年乙丑二月二十七日己未薨特封中山王諡武寧享年五十有四爰以是年四月十八日己酉葬於鍾山之陰生男四人世子允恭襲封魏國公女四人長燕王妃王平昔言簡慮精當提兵之時令出不二諸將敬若神明所至之處攻城不屠與人不戲凡受命而出及功成而旋每不自矜至於封姑蘇之府庫置元宮之美人財寶無所取婦女無所愛忠志無疵昭明乎日月旣薨朕恐歲月幽遐磨

迷偉績朕特親筆生前張我武威偃兵息民混一區夏
奠安神人之勞以示子孫耿光萬世勒諸堅石樹當神
道歌曰景命昌兮天彰錫我英俊兮忠良幽韜秘略兮
神機默溫溫兮兼剛秉旄鉞而徂征兮既出幙幢繚繞
兮雄氣軒昂戰騎靈兮蹄疾旌旗烈烈兮前行六軍濟
濟兮甲冑礪矛燦爛兮精銳舍之兮周廬星列屬橐兮比
比懸傍刁斗聲頻兮令密山川妖魅兮奚藏彎弧力勁
兮射欃槍幾披星月兮秋霜奮志海內兮孰前當摧堅

撫順兮我武惟揚

臣惟古功臣之薨壙有誌墓道有碑禮也然自唐以來皆命詞臣為之惟我聖皇芟夷羣雄混一區宇雖股肱爪牙非止一人而中山武寧王實元勛之首南收吳越北定中原東平齊魯西入關陝大抵皆王之功今其薨也聖上以王豐功偉績始終本末非詞臣所能周知故親筆之刻置墓道自古人君禮報功臣未有若斯之盛者也臣等不敏幸得同侍經筵欽覩

御製不勝感激流涕謹拜手稽首書於碑文之左文淵閣大學士奉議大夫臣朱善承務郎左春坊左贊善臣劉三吾承務郎左春坊司直郎臣汪仲魯翰林院侍詔臣沈士榮孫大雅謹書

勅賜滁陽王廟碑

張來儀

洪武十六年十一月七日皇上親蒞滁陽王事實召太常司丞臣張來儀諭之曰王之恩德注在朕心今滁有廟祀而碑刻未具甚闕典也汝其據此為文於石臣來

儀謹再拜奉詔按王諱子興姓郭氏其先曹州人王父少好術數常從異人遊得其書年長未娶南遊定遠邑人神其術將有為叩之必驗邑中富翁家有處女以瞽未許稼王父過其門翁以女命來卜數成曰此貴人也翁曰瞽目未配王父曰翁能不鄙我乎則妻之翁曰諾既而娶不數年夫婦家日贍生子三女一王中子也始生父卜之喜謂人曰是兒得佳兆異日非常必大吾家既長兄弟別業三人皆善殖產元末民間有造言者王

誤中其說信之甚篤忽不事業而妄散家財陰結賓客
至正壬辰汝潁兵起王識天下當變乃召所結賓客子
弟拔濠梁據之時皇上潛居民間為訛言所逼懼禍將
及遂挺身入濠梁抵其城為門者所執將欲加害人以
告王王親馳活之撫之麾下間召與語異之取為親兵
居數月王謂曰汝單居當為汝婚王暮歸與夫人飲食
語及斯事次夫人忽惋惜謂王曰方今兵亂正當收召
豪傑是子舉止異常若不撫於家而使為他人之親是

失智矣王悟遂以女妻之孝慈皇后是也王為人勇悍
善戰時軍師四人名位皆在王上王素剛直不屈人下
每遇事四人瞋目語難而王剖決通敏數以非語侵之
衆故含忍未幾客軍首帥彭趙以兵來駐濠二姓皆僭
稱王王等遂為所制一日衆挾趙勢拘王於獄將害之
皇上自軍馳歸或曰勿往曰再生父母有難可不赴乎
遂入王家明日彭帥聞遣人釋王以歸明年夏還故里
收元卒七百獻王王就令將之又明年夏染朮疾未差

王聞元義兵欲歸將說之左右無可使特過寢門示意
趙趙因請扶疾往卒說降之得其精卒三千既而彭趙
東屯泗洲因挾王以往時皇上方駐滁陽知衆不可共
事獨堅守以待復遣人賂彭趙左右賂行王得縱歸滁
陽時王兵共四萬其麾下僅萬人皇上所部三萬有奇
明年乙未王命守和陽既而信流言親至和陽視師值
王仇人亦駐其中聞王至移軍異處皇上禮送行者俄
為所艱王聞驚懼得疾尋卒歸葬滁州夫人張氏生三

子長戰歿次為降人所陷幼與羣小陰謀伏罪次夫人張氏生女一為妃生蜀王豫王如意王女二洪武元年天下既一剖符行封追思更生之恩實帝業所始乃封滁陽王建廟墓滁陽命有司歲時率滁人祭之臣來儀伏聞自古帝王之興雖受命於天未始不因乎人蓋必有所佑助維持而後成及其既成也其所佑助維持之者亦得以與享其榮傳之無窮而施之罔極惟我皇上奮布衣提一劍而起外無尺土一民之助而王能脫危

難識幾微納於貳室授以兵柄慨然不少吝惜遂肇大業可謂有知人之鑒矣及今大統既定四海一家推本尋源實由於王爰建顯號俾永永血食蓋非王無以開萬世之業非皇上無以永王之名臣謹即是為銘銘曰皇受天命發跡濠梁方其始興附於滁陽滁陽先知識聖於微聖有大難王脫其羈取彼神龍翼之風雲浴日咸池洗其垢氛龍騰日升伊誰之功有相自天實啟王衷皇奮無旅王命予之皇室無嬖王命女之謀行諫從

肝胆勿疑萋斐之言終莫我離秉鉞專征付以閫外顛
強感驕有衆日大變生不意卒疾於驚何啟其緒勿享
其成皇明日昌旣臣萬方割符錫爵乃侯乃王爰念舊
恩極天罔報一飯必酬矧有大造乃封大郡乃建廟廷
乃復滁人護其園塋祠官孔嚴報祀春秋壘酒釃羹黍
稷羊牛王其來歆勿曰無後王女皇妃三子挺秀王支
百世王有廟祀紛紛羣雄孰王之似小臣受詔作此銘
詩勒著貞珉以永無期

鄂國常公開平忠武王神道碑銘 宋 濂

洪武二年己酉秋七月七日銀青榮祿大夫上柱國中書平章軍國重事兼太子太保鄂國常公薨於軍中二十三日訃聞皇帝為之震悼罷朝在廷之臣莫不灑泣越明日詔中書定議贈翊運推誠宣德靖遠功臣開府儀同三司上柱國太保中書右丞相追封開平王諡忠武八月朔日輅車至龍江上往臨奠慟哭而還親為擇地於鍾山草堂之原營建宅兆及棲靈之祠凡百須之

具一給於官不以煩其家至冬十月九日始塋復推恩
及其三代皆為王爵生榮死哀可謂至矣上猶念其功
不置召臣瀛於庭而謂之曰朕東撫高麗西抵吐番北
際沙漠南來交趾占城莫不稽首奉命計其開拓之功
以十分而言王蓋居其七八朕今手錄戰伐次第以授
爾尚為文勒諸豐碑以著王之功於無窮焉臣瀛受詔
而退謹再拜序而銘諸幽王諱遇春姓常氏濠州懷遠
人世為農家賦性剛毅膂力絕人歲壬辰羣雄並起江

淮為之鼎沸時王年二十有三為羣盜劉聚所得聚覩王狀貌奇偉拔於行伍而信任之王每出戰必鼓勇爭先聚深喜之王察聚所為終不能有成欲擇所依乙未聞上駐兵和州領衆數十人棄聚來歸居兩月餘請為前部先鋒上曰爾之來者為士卒糧絕故就食耳爾自有主我安得而留之王請之再三至於涕泣上曰爾姑從吾渡江俟克太平委身事吾未晚也夏六月上先抵采石磯元兵陣於磯上而磯下巨舟如織相距僅三丈

餘猝難登岸王乘快舸相繼而至上麾之使前王即舍舟挺戈先登衆皆披靡遂拔采石乘勝取太平從上守禦廼始授總管府先鋒冬十月陞管軍總管丙申春二月元中丞曼濟哈雅復以兵屯采石南北不通上慮將士雖渡江而其父母妻帑尚留淮西勢莫可致命王統兵攻之王至設疑兵以分其勢而以正兵與之合及戰別出奇兵擣敗之悉俘其精銳自是元兵扼江之勢衰矣尋守溧陽攻建康功為諸將先三月從今大將軍右

丞相徐公達克鎮江夏四月授承信校尉領軍先鋒秋
九月再攻常州會有軍叛去與偽吳張士誠合徐公被
圍於牛塘王與諸將力戰大敗其衆擒士誠梟將張將
軍德冬十有一月陞統軍大元帥丁酉春三月遂克常
州遷中翼大元帥夏四月從徐公下寧國秋八月克馬
駝池冬十月取池州戊戌春擢江南行中書省都督馬
步水軍大元帥冬十有二月上親取婺州己亥夏四月
轉鎮國上將軍同僉書江南等處行樞密院事守婺城

尋命攻衢州降之冬十月陞僉院十有二月攻杭州庚子夏五月召還京師從徐公拔安慶趙普勝之水寨時偽漢陳友諒揚言援安慶王策其必攻池州以羸弱守城伏銳士於九華山明日友諒兵果來攻城伏兵四合俘殺萬餘人六月友諒入太平犯龍灣王共謀擊敗之已而上整舟師襲友諒留王守京師軍民無敢譁辛丑春三月拜江南行中書省參知政事秋七月從上取安慶破江州回守龍灣冬十一月張士誠出兵寇長興上

時駐九江聞報還京師命王往援士誠兵敗俘殺五千
餘人壬寅春修安慶城羅友賢搆亂據池州神山寨將
與士誠通杭歙震動命王往攻之癸卯春正月擒斬羅
友賢餘黨悉平三月張士誠遣兵圍劉福通於安豐王
從上擊之將戰王突入其陣三戰三勝敵兵大敗而去
俘獲士馬無算遂同徐公圍廬州凡三月城將下適陳
友諒攻南昌王解圍而還秋七月從上率諸將往援八
月遇友諒於彭蠡湖之康郎山王與之聯舟大戰呼聲

動天地無不一當百縱火焚偽平章舟風急火熾十里之間湖水盡赤敵將張定邊素號梟猛奮前迎戰王射之定邊中矢走友諒乃退保鞋山諸將以友諒兵尚強請縱其去王獨不言及我師出湖口皆言江流湍急欲放舟而下上知其情命以舟扼上流王應之諸將乃溯流而上舟蔽江面控湖口者旬有五日夜諒軍食乏出江求戰王遣火舟火筏禦之敵兵奔潰追北數十里與之酣戰自辰至未不解上所乘舟及王舟皆膠於沙王

既脫御舟而已舟被圍復力戰而脫於是友諒中流矢
死士卒十萬皆降未幾其臣立友諒之子理於武昌冬
十月王帥師討之四面合圍甲辰春二月理銜壁出降
荊湖之地望風皆附陞中書平章政事秋七月從徐公
取廬州八月遂自將兵平臨江之沙坑麻嶺十洞牛陂
諸寨進取贛州乙巳春正月克之悉定南安南雄韶州
夏五月還兵取安陸襄陽冬十月從徐公克泰州丙午
春三月復從克高郵夏四月淮安濠泗徐宿安豐皆下

秋八月諸將攻浙西師次太湖偽萬戶尹義等逆戰王擒之直趨湖州之毗山與敵兵水陸鏖戰敵兵大潰遂抵城下塞其四門晝夜環攻之偽丞相張士信悉發境中兵為援屯於舊館出我師之背王統奇兵由大全港入結營東阡復出敵背且填壅溝港絕其歸路士誠知事急親出兵拒關王一鼓勝之士誠復遣其將徐義統赤龍船親軍來援王復擊之敗於烏鎮冬十月舊館降得兵六萬十有一月湖州亦下遂進圍平江丁未圍之

益急士誠收合餘燼猶背城百戰降其將士且盡秋九月始克之縛士誠來獻籍其兵二十有五萬乃加授中書平章軍國重事疏封鄂國進爵上公冬十月復授征北副將軍同徐公奉命北伐戊申春正月上即皇帝位國號大明改元洪武王與徐公下山東諸郡遂攻汴梁守臣李景昌遁進攻河南敵兵五萬屯於洛水之北將出迎戰王布陣既定單騎執弓矢衝入其隊敵發二十騎攢禦刺王王一箭中其前鋒大呼殺入悉獲其衆而

河南諸城先後皆平上幸汴京謀取燕都秋七月徐公與王渡大河河北諸郡又平八月三日燕都不戰而克元君北奔師次太原其守將庫庫特穆爾帥衆來禦其鋒銳甚王與徐公謀曰我騎兵雖集而步卒未至何以能戰莫若遣精騎夜劫其營其衆可亂衆亂主將可縛也徐公如王言庫庫特穆爾果中傷而遁己酉春正月進攻大同竹真棄城走河東又平遂西入秦張良弼遁李思齊迎降奉先鳳翔鞏昌臨洮又平夏五月元將伊

蘇侵通州有旨命王以所部軍東還拒之遂擣永平過
惠州獲江文清士馬以千計至大寧伊蘇遁破開平元
君又北奔追至北河俘其宗王三人及平章鼎珠等凡
得軍士萬人車萬兩馬三千牛五萬全師還燕次柳河
川得疾而薨享年僅四十耳王之為人守謙而不矜有
功而無過運籌決勝之方不學而能其從大將軍東征
西伐而能遵守節制及其自將兵則所至無不克捷由
其智識明而材力雄故施之各得其宜嗚呼若王者可

謂開國之殊勲者矣王之曾大父四三府君累贈銀青
榮祿大夫上柱國中書平章政事追封開平王諡莊簡
妣張氏追封開平王夫人大父重五府君累贈開府儀
同三司上柱國少保中書平章政事追封開平王諡安
穆妣陳氏追封開平王夫人父六六府君累贈開府儀
同三司上柱國太保中書右丞相追封開平王諡靖懿
妣高氏追封開平王夫人妻定遠藍氏封開平王夫人
子男三人曰茂曰昇曰森皆上所賜名女三人長許為

皇太子妃餘皆幼臣濂聞之昔日唐太宗起義兵而定天下當時有尉遲恭者棄劉武周仗劍來從其後輔成唐業而恭之功為多於是生有鄂國之封歿有忠武之謚今王之功非恭之所可及上之所以遇王者封謚與之雖全而其王爵之加恩數優渥揆之於唐誠又過之史臣所謂君臣相遇千載一時者豈不異世而同符也哉是宜銘諸貞石傳之千萬世一以昭聖天子垂念功臣如此之至一以著王之勲烈於不朽云爾銘曰聖皇

開天豪傑四從龍興而雲虎嘯而風義旗所指山岳震
動颶馳霆春孰不神竦維忠武王其氣至剛仗劍來從
飛渡大江無堅不摧無敵不碎席卷長驅易如拾芥平
吳定越帖荆撫淮威聲所加大小畢來齊魯既寧汴洛
亦定直指幽燕不戰而勝元君遠逝六軍倒戈本根旣
撥何有條柯乃收晉冀乃清秦隴乃徇遼海人百其勇
茫茫朔漠灤河所經誓將剗滌邊塵弗驚王之忠精上
貫天日煜其有光亘古不沒副戰百捷備殫勤勞光輔

帝業翊運之勛靖遠之威在古或罕於今見之大功垂
成王忽長逝當寧興哀如失一臂爰加恩寵用錫王封
袞衣繡裳炤耀泉宮天子曰噫未慊朕志其推爾爵上
褒三世死生哀榮孰可比焉王雖云沒生氣凜然鍾山
之陰隧道有石詞臣勒銘垂示千億

明名臣琬琰錄卷一

欽定四庫全書

明名臣琬琰錄卷二

明 徐紘 撰

曹國李公岐陽武靖王神道碑銘

有序

董倫

洪武十有七年春三月開國輔運推誠宣力武臣特進
榮祿大夫右柱國大都督府左都督曹國公同知軍國
事李公薨於第皇上輟視朝三日親製文遣使致祭追
封岐陽王謚武靖賜塋地於鍾山之陰越三年秋有司

奏王神道碑石已具而未有刻辭明日詔臣倫為文撰次王之勛德以寵其子孫於無窮臣倫再拜稽首而退謹按王諱文忠字思本姓李氏世為泗州盱眙人父隴西恭獻王尚曹國長公主生王十有二歲而公主薨時元末大亂恭獻攜王走軍中幾不能存聞皇上駐兵滁陽始來見焉皇上喜甚即自養育擇師傅以教之一日取所業示近臣曰是亦可矣當於馬上習之歲丁酉乃以舍人領軍策應池州偽漢陳友諒發兵寇城王奮擊

敗之戊戌春正月進攻青陽石埭太平旌德皆下二月
敗元判院鄂爾和於萬年街遂破苗獠于於潛昌化獲
其婦女輜重甚衆王恐士卒恃此富驕莫有鬥志因激
怒使其盡殺所獲焚其輜重曰此何足惜能努力破敵
何患不富貴乎衆咸奮厲進次淳安夜襲破偽洪元師
營降其衆千餘三月會寧河王鄧愈越國公胡大海兵
取嚴州授帳前總制親兵都指揮使司左副都指揮兼
領元帥府事守嚴州時嚴新破城壁未備而偽吳張士

誠遣其徒率苗獠水陸奄至王與戰大敗其衆復取所
斬俘馘載巨筏中乘流而下水寇見之亦遁冬十有二
月帥師攻諸暨克之壬寅春三月擢浙江等處行中書
省左丞癸卯春二月苗獠蔣英構亂金華賊殺越國胡
公王聞亂率兵馳賊委城夏四月守將謝再興據諸暨
以叛上命築新城於諸郡之西以拒之秋九月再興誘
士誠寇東陽王自嚴將銳師破之冬十月陞右丞乙巳春
正月士誠遣偽司徒李伯昇大率其徒號二十萬寇新

城王聞之即合將士未至新城十里許有地曰龍潭立營其上新城守將遣人由間道詣王曰衆寡莫敵姑宜避之以俟大軍之至王曰以衆論之則我非彼敵以謀論之則彼非我敵且八千之謝玄破八十萬之苻堅庸非衆乎吾若未戰而退則彼勢益熾雖大軍至亦難為攻矣莫若與戰死中求生正在今日何避之有遂下令曰彼衆而驕我少而銳以銳當驕可一戰而擒擒彼之後輜重皆汝等有也明日交戰王橫槊據鞍引數十騎

乘高馳下直出陣後衝其中堅敵列騎逆戰王格殺數人出入陣中所向皆靡因督衆乘之敵遂大潰亂自相蹂躪城中將士亦鼓譟而出呼聲動地莫不一當百斬首數萬級擒將士七百餘人委棄鎧仗彌亘山丘自是張不能寧矣丙午八月召還京師陞受宸算總水陸之師下江浙冬十月師進克桐廬新城富陽至餘杭謝再興子五人嬰城固守王合圍攻之一日而拔杭守將潘允明聞之恐遣員外方彛詣軍門請降王曰師來臨城

而員外遠來得無以計緩我師乎彛曰大人奉命伐叛
所過秋毫無犯杭雖孤城生齒百萬擇所托而來尚有
他意乎王見其誠引入卧内歡笑款接因命條畫入城
次第翼日遣歸允明遂封府庫籍軍數出城拜降王入
宿於城上令曰敢有擅入民居者斬有一卒下借民釜
即磔以徇由是內外帖然民皆不知有更革事就加榮
祿大夫浙江等處行中書省平章政事戊申春正月上
即皇帝位國號大明改元洪武二月閩中旣平餘燼復

合詔王討平之二年春以王為偏將軍副開平王常遇春征進迤北由遵化度鹿兒嶺敗江文清於錦川次大寧元將伊蘇逆戰一鼓敗之追至灣河斬其宗王慶生遂進次大興王度其必走乃分兵千餘伏其歸路敵果夜遁遇伏大破之斬其將鼎珠進克上都秋七月開平王薨於軍中八月詔王領其衆接援慶陽師至太原大將軍中山王徐達已討平之王聞大同受敵甚急因諭衆曰吾與若等受命而來閫外之事有利於國者專之

可也若候進止吾恐大同之敵愈盛不可復制於是出
鴈門次馬邑元邏騎數千猝至王與戰擒其將劉平章
進次白陽門又擒敵中四大王前軍已去敵五十里為
營王至遽令遷之復前進五里阻水為營是夜敵果悉
銳來攻王堅壁不動委二營以待敵督令死戰自寅至
辰度其飢疲乃分軍為左右翼出擊大破之乘勝逐北
擒其將圖魯卜降衆萬餘遂進兵至莽格展不見敵而
還三年春正月授征北左副將軍總兵北伐二月師出

野狐嶺降其守將進師察罕諾爾擒其平章祝貞夏五月克應昌獲元孫密迪哩巴拉及后妃宮女金寶玉冊以歸元太子僅脫身走追之不及而還過中興擒元將江唐國公進攻紅羅山其擁兵自固者皆請降冬十月朝廷論功行賞加開國輔運推誠宣力武臣特進榮祿大夫右柱國大都督府左都督曹國公同知軍國事食祿三千石賜鐵券四年西蜀平詔王帥兵鎮撫五年春詔王同中山復征迤北王總兵東道五月取和林師進

於昆至哈喇穆爾敵連遁去王曰兵貴神速千里襲人
難多重負乃留東平侯韓政駐輜重於廬車河令士卒
各持二十日糧兼程並進至圖喇河元將哈喇章曼濟
悉起營渡河列騎以待王督軍力戰敵却追至翰海敵
來益衆王據險為營示以單弱敵疑有伏遁去軍還失
故道乏水渴死者甚衆王患之至格爾瑪斯出野尋水
脈忽所乘馬以足跑地泉隨湧出三軍賴之乃刑牲以
祭六年冬十月將兵屯代縣出朔州擒元大位巴延巴

哈七年春詔總兵北征王駐兵代縣遣將各出至賽音布拉克擒其平章陳安禮瑪蘇緒至於順寧門陽者斬其將珍珠律至白登者俘其國公鄧博囉特穆爾秋七月攻大寧高州大石厓克之斬其宗王托多實哩擒承旨巴爾嘉還自是邊境肅然矣十三年詔參贊國事裨益恒多至十六年冬十有二月王有疾明年春疾轉亟東宮臨視明日上親幸其第撫悼良久乃還王召諸子訓以大義翌日而薨時三月丙戌日也享年四十有六高

祖諱某贈中奉大夫浙江等處行中書省參知政事妣
林氏贈夫人曾祖諱某贈貲善大夫浙江等處行中書
省左丞護軍追封臨淮伯妣蔡氏胡氏俱贈臨淮伯夫
人祖諱某贈榮祿大夫浙江等處行中書省平章政事
柱國追封隴西侯妣陳氏贈隴西侯夫人考諱禎特進
榮祿大夫駙馬都尉右柱國曹國公追封隴西王諡恭
獻妣曹國長公主太皇太后所生皇上皇姊也繼妣陳
氏追封淑德夫人王娶畢氏累封曹國夫人子男三世

子景隆襲封曹國公次增枝次芳英皆上所賜名女長
適汪致淵次適高昂孫男順安女一王器量沉閎人莫
測其際臨陣蹈厲奮發至遇大敵膽氣益壯故有不戰
戰必勝及釋兵家居恂恂若儒生嘗師金華范祖幹胡
翰講明性理之學其處身處家一循理度惟謹及出為
詩詞皆偉壯可觀至音樂華靡泊如也嗚呼王起貴戚
際風雲之會東征西討挺立殊功名滿天下生有大國
之封死有王爵之賜壽雖不及而耿耿者固將與國相

永久非可與身同泯也臣倫故謹掇其大事有繫於世者為之銘銘曰天生聖人篤開大業風行電指孰不震懾時惟武靖豐頤秀頰皇親訓迪才日煜煜猥長三軍屢奏佳捷俾莫南服民心孔愜新城之役血滔四流以少制多歸王之謀武林之兵降其守臣市不易肆歸王之仁先聲旣赫聞者膽落直擣其穴王公就縛彼卒如羊我卒如熊摧陷無堅皆王之功王乃憊然曰我有成皇上所教匪臣之能海宇載穆倚樹嘯吟王雖不言簡

在帝心錫封於曹旌王之勞金符刻誓天意彌高乃贊
國經高密是紹秉誠束禮百僚可表壽豈惟多天奪之
暴星殞砥折伊誰控告皇上悼閔賜茲刻文百世之下
昭王崇勛

衛國鄧公寧河武順王神道碑

朱夢炎

洪武十年冬十一月初九日開國輔運推誠宣力武臣
特進榮祿大夫右柱國衛國公鄧愈自河州召還至壽
春以疾薨訃聞上哭之哀為輟朝三日詔追封寧河王

謚武順其月十九日柩車至三山門車駕臨奠且親視其葬地而舊塋在鳳臺鄉者狹隘弗稱上乃遍覽傍近岡阜擇於城南西山之原寬平爽塏敕有司營建墓兆仍命遷王母夫人及弟嘽之喪同葬焉凡喪事所須皆官給之思至渥也上猶念其功不已召臣夢炎等於廷諭之曰愈事朕二十二年東征西討勤勞至甚歷鎮八州有功無過爾其撰文刻之石以昭不朽臣謹按公牘所載賜名愈泗州虹縣人三世弗仕以王貴曾祖父大

公贈資善大夫中書右丞追封臨淮伯曾祖母孟氏追
封臨淮伯夫人祖父太公贈榮祿大夫中書平章政事
柱國追封南陽侯祖母戚氏追封南陽侯夫人父諱順
興贈特進榮祿大夫大都督府右都督右柱國追封衛
國公母張氏追封衛國公夫人王生而魁偉幼有大志
勇略過人元季壬辰天下雲擾王父衛國公起兵於鄉
遂戍臨濠與元兵戰死之長兄友隆代領其衆未幾友
隆病卒衆推王領軍事年方十六王出戰必挺身破敵

軍中咸服其勇歲乙未上駐師滁陽王自盱眙率所部
來附克管軍總管其年夏六月從度大江克采石取太
平繼而元將曼濟哈雅以舟師振采石陳頤森合兵數
萬逼城下上親督兵禦之調王與魏國公以奇兵出其
後大敗之生擒陳頤森丙申三月定金陵拔溧水破鎮
江王皆與有功陞元帥出守廣德冬十有二月長鎗謝
元帥率衆來寇王出城奮擊俘其總管武世榮及軍士
一千餘人丁酉三月轉行樞密院判移戍宣州七月領

兵取休寧績溪乘勝克徽州元將敗走十月浙江苗元帥率衆十餘萬來攻城時徽州新附城郭未完守禦之器未備王激厲將士明立賞罰與越國公胡大海等分門並出奮兵力戰大敗其衆生擒部將胡辛等一百五十八人賊衆奔潰婺源元江同僉領兵來降戊戌正月擊破特穆爾巴哈元帥寨斬首五百餘級追至婺源東門擒殺特穆爾巴哈獲士卒三千餘人遂克婺源三月取嚴州四月攻淳安縣賊帥金子珍敗走獲馬一百餘

匹降其頭目軍士三千餘人遷同僉樞密院事五月浙
江苗陽復率衆屯徽州烏龍嶺拒却之九月轉僉書行
樞密院事己亥正月領兵略浙江臨安大敗張寇於閑
林寨庚子七月番陽院判于光及右丞余椿擊走偽漢
部將辛同知取饒州遂以其城來附有旨命王往鎮之
饒城彭蠡湖而偽漢主陳友諒尚據江州數遣舟師來
攻城王斂兵東門外與余椿于光等連營以拒之屢殲
其衆賊兵遂退辛丑正月除江南行省參政仍兼僉書

行樞密院事總制各翼軍馬饒之境内弄兵者尚懷疑阻王推誠結納撫以恩信於是左丞吳宏等皆請降八月領兵襲浮梁偽參政侯邦佐棄城遁八月取樂平擊敗蕭總管五千餘衆擒萬戶彭壽等六十八人饒境悉定進取江西十月駐兵於臨川之平塘時鄧克明據撫州遣使通款而實無獻城之志王知其情卷甲夜趨比旦入城克明單騎遁翌日遣人以分省印來獻王號令嚴肅秋毫無犯江右之民室家相慶爭持牛酒迎勞王

悉却而不受是時上親討偽漢主陳友諒於江州友諒
敗走遂下江西命王以步兵來會車駕至南昌有旨授
王江西行省參知政事留鎮之時壬寅正月四日也癸
卯夏四月友諒悉國內兵圍江西江水暴漲寇舟直抵
城下王與諸將協謀固守屢挫其鋒賊勢大阻相持者
凡三月會上親率援兵至湖口友諒懼而退大戰康郎
山友諒竟死甲辰三月新淦土豪鄧青叛以卒二萬人
據永豐王調兵破之擒賊首明理問劉右丞五十一人

八月從開平王平臨江之沙坑麻嶺十洞諸山寨合兵圍贛州降之南安南雄韶州皆送款乙巳正月進江西右丞加湖廣行省平章出鎮襄陽西抵巴蜀北控河洛烽火相望新附之民未有定志王撫而鎮之民懷其惠軍忘其勞遐邇悅服吳元年十月擢拜御史大夫洪武元年命大將軍經略中原而以王為征戍將軍征取江淮未取州郡三月攻唐州克之又取南陽生擒蔡國公史克新等一十七員軍士一千五百人馬一百五十四

七月克隨州右丞王誠降九月進取洪山老馬劉寨夜
四鼓斬關而入擒殺甚衆冬十有一月率兵討蜀河恭
張獲之金商均房之境悉定三年命王為征北左副將
軍平隴右大敗王保保於定西招諭河州土番諸部元
帥何索諾木布哈濟汪來等皆納印請降於是河州以
西朵甘烏思藏等部來歸者甚衆冬十有二月定功行
賞特封衛國公食祿三千石賜以鐵券五年命王為征
南將軍討澧州等處溪洞蠻夷平之九年吐蕃所部州

城邀沮烏思藏使者掠其輜重有旨命王為征西將軍
往討之十月王與副將分兵為三併力齊入覆其巢穴
窮追至崑崙山斬首不可勝計獲馬牛羊一十餘萬上
嘉其功遣使召還未至薨王以元後至元丁丑二月十
五日生享年四十有一兄弟三人長即友隆弟嘽仕至
羽林衛指揮僉事先王五年卒夫人曹氏側室王氏徐
氏子男七人長鎮羽林衛鎮撫

鎮後於十三年服制既
終命襲封為中國公

次銘次鐸次銓次太平奴皆庶出女四人長女夫人曹

氏出也為秦宮妃次適河南護衛指揮周巖餘尚幼孫
女一人王之莖也以是年十有二月二日丙午惟王器
量宏偉而沉毅簡重謙恭慎密而奉公守法臨大敵而
不懼有大功而不矜又能禮賢下士寬惠愛人廣德宣
州徽嚴饒撫南昌襄陽八州之民至今猶懷其德事母
夫人能致其孝撫弟孤幼能致其愛蓋不獨將略之雄
兼有君子之德宜乎為國元勛光輔帝業而膺上眷之
隆者謹再拜稽首而為之銘曰聖皇受命地闢天開掃

清六合鼓舞羣材惟武順王雲龍風虎仗策來從誓以
身許飛渡大江奮戈前驅斧堅摧鋒何敵不除一舉姑
孰再舉建業馳電掣百戰百捷玉節飛雲金戈凜霜
有赫其威往征羣方乃輯浙東乃撫江右大閫煌煌厲
我城守孰謂狂堅而敢憑陵自速厥辜江漢底平帝用
有嘉平章湖廣駐節荆南爰資開蕩化仇而恩循暴而
柔以德輔刑澤及八州武功告成四海一統爵以上公
受天之寵烈烈征西極討窮追殲彼勁敵張我皇威召

還有期中道而逝九重痛悼三軍隕涕念王之忠開拓
建功念王之德無忝始終何以報之王封是錫衮衣繡
裳光賁泉宅西山之原墓門有石視此刻銘永錫無極
信國湯公東甌襄武王神道碑銘 方希直

洪武三十一年九月壬辰皇帝御奉天門故東甌襄武
王之孫昱頓首言曰先臣和沒已三年墓道之碑已具
而未有刻文惟陛下憫之俾史臣有述焉制曰可臣昱
至翰林以文為請臣謹以其事聞有詔俾為之銘臣乃

言曰昔元德既衰天下大亂我太祖高皇帝以神武明
聖之資哀生民之無辜奮袂一麾四方響應芟夷僭盜
蕩滌兇奸十餘年間遂濟大業雖曰天命所屬不以智
力然猛將名臣之勳著於王室有可徵者昔王之歸鳳
陽新第也高皇帝有餞賜之勅其薨也有祭誄之文帝
自謂與王同受知滁陽稱其智勇過人命勒石以紀勞
績聖情深厚矣今陛下不遺舊而賜銘其碑以寵綏湯
氏實行高皇帝之遺志臣執筆從太史後何敢卒讓謹

按故開國輔運推誠宣力武臣特進光祿大夫左都督
左柱國議軍國事信國公追諡襄武封東甌王姓湯氏
諱和字鼎臣世居鳳陽縣之東湖里曾祖五一府君祖
六一府君皆以王貴追封信國公考七一府君贈特進
光祿大夫右都督左柱國追封信國公曾祖妣闕氏祖
妣周氏妣謝氏俱封信國夫人王幼喪二親卓越有奇
志嬉戲常習騎射指使羣兒父老異之及長身長七尺
個儻饒智略元至正間豪傑多起兵據郡縣王亦思自

奮拔以取富貴壬辰歲滁陽王據濠兵勢強率所厚壯士千餘人仗劍從之滁陽王竒王驍勇置之麾下使從諸將略地每在前行命為百戶取九灣攻濠之定遠得兵千百五人推為千戶時高皇帝處滁陽王甥館上委心推奉率兵從大洪山寨得兵八百陞長萬未復從攻滁州獲其守帥以功多授管軍總管招集士卒益衆又明年甲午帝自取和州諸將多滁陽王貴部曲顧望未盡效臣禮惟王以所領兵聽命甚謹帝心嘉焉會敵兵元

帥陳頤森復攻和州王與將士擊走之乙未六月帝渡江下采石定太平王獲敵馬三百士卒稱是既而頤森與其將康將軍水陸分道寇城王擊其水軍矢中左臂怒氣益奮中山王徐公達寧河王鄧公愈帥師由東門轉戰城北破其步軍遂生擒頤森以獻王分兵取溧水句容克而守之丙申帝定建業三月王偕中山王取鎮江一日克其城兵不血刃陞統兵元帥復同中山王取金壇及富莊七月轉同僉樞密院事丁酉三月克常州

奉命鎮守其地攻取江陰明年偽吳張士誠兵寇常州
王力戰却之擒其卒三百十月復來寇俘甲士千餘舟
數十艘馬數十匹賊勢為之少沮壬寅偕中山王攻無
錫癸卯大破士誠兵於陽山斬其梟將獲甲首五百級
逐其別將莫將軍擄其妻子以還拜中書左丞甲辰士
誠弟偽丞相士信寇圍長興王率步將吳福興會開平
王常公遇春軍合戰士信大敗而退超遷中書平章乙
巳擊江西劇盜姚大膽斬之遂取永新州戮偽左丞周

安等籍士馬歸於京師仍出守常州丙午帝命諸將伐
士誠畧太湖營於舊館降偽將呂左丞等獲其兵二千
馬八十匹轉戰湖州守將張右丞降進擊吳江州將不
能格亦降遂薄姑蘇圍之明年丁未為吳元年九月中
山開平與王益督兵力戰卒平姑蘇縛士誠以歸三吳
悉定除御史大夫兼太子諭德階榮祿大夫時方谷珍
據溫台慶元三郡與士誠比境聞士誠敗固已震恐王
督諸軍征之谷珍懼乘大舶逃匿海島中王遣人持書

喻以國家威德谷珍即率昆弟子姪待罪軍門得兵械
舟楫以萬計所至不擾王之功居多乘勝下福州戊申
帝即大位改元洪武王略定閩中諸郡至延平主帥陳
友定怙險橫甚令其副出城降觀望持兩端王擒之以
歸東南海上晏然是歲九月帝幸汴梁王實彪從既而
與宋國公馮勝取懷慶澤潞晉絳二年同中山王拔河
中渡河入潼關趨鳳翔越六盤關皆平明年與中山王
宋國公至定西襲元帥庫庫特穆爾營西北取寧夏至

察罕誥爾獲其猛將虎陳定東勝大同宣府皆以勞先
諸將九月還京師論功行賞錫以鐵券封中山侯號開
國輔運宣力武臣階榮祿大夫勛柱國祿一千五百石
明玉珍乘中國亂僭號四川以重慶為都玉珍死其子
昇立四年詔王及德慶侯廖永忠統諸將征之昇鎖瞿
塘峽以遏舟師王以計敗之水陸並進直擣偽都昇不
能支率其臣屬奉金寶以降五年同中山王北征窮追
和林明年覽通州外郭八年移鎮彰德覽其城是冬追

元逋臣已延特穆爾於察罕諾爾獲馬牛羊無算十年正月元日帝念王之功加號推誠位特進階為光祿大夫職為左都督勛為左柱國爵為公國於信俾議軍國事加祿至三千石仍賜鐵券王益恭畏不自驕盈繼與歧陽王李公文忠練卒於鳳陽鳳陽濠之賜名也明年巡撫西河州繕完其城郭營舍十四年偕中山王北伐下灰山擒其平章必里克及樞密副使久通又明年詔至四川永寧治墉壕飭士馬十八年五開山獠為亂王

帥師討之夷其窟穴俘戮四萬人及入朝王以春秋高思歸故鄉從容乞骸骨羣公次第以為言帝喜之賜寶鈔五萬俾造第宅於鳳陽而謂王曰日本小夷屢擾東海上卿雖老強為朕行視要害地築城增戍以固守備王築海上數十城民四丁取其一為兵以守之二十一年新第以成告率妻子陞辭賜白金以兩計者二千黃金以兩計者二百鈔以緡計者一萬五千文綺四十端信國夫人胡氏亦賜金錢文綺甚厚俱降手勅褒嘉之

二十三年元旦朝於京師忽被末疾且失音不能言帝聞之大驚即命駕臨視嘆惋久之遣歸故里十月詔王之子將命召至邸賜以安車入殿庭燕勞備至復厚賚俾歸以俟有瘳二十七年王疾彌甚不能興帝思見之特召輿入親手為摩撫語及舊勞對之雪涕賜鈔六百五十緡預為營塋之資二十八年八月七日薨於里第之正寢至是年七十矣訃聞帝感悼為之不御朝者三日追封定諡親為太授使者以祭命親王咸遣祭於其

家棺槨明器冢壙皆官為之以是年十一月十二日葬於縣曹山之原詔肖像於功臣祠配饗於太廟祥禋必賜祭高皇帝禮遇功臣加恩於王恩禮之隆時莫與比夫人有婦德明詔稱其賢子五人曰鼎署前軍都督府僉事曰輒太原中護衛鎮撫曰鼎曰變皆早卒曰醴同知左軍都督府階榮祿大夫將兵征五開卒於軍女五人孫男十一人曰昱暹昇晟鼎景昇昺昱晟其嫡也孫女四人曾孫男一人女二人皆幼王沉毅質直勇而

善斷不妄發言入聞國論一語不泄於左右行師受任
有詔即行不少顧家臨敵果敢堅忍未嘗挫衄有語及
兵書者輒笑曰臨陣決機在智識敏達耳何以泥古為
家畜妾媵百餘暮年皆資遣寧家得賞賜多惠鄉黨父
老及孤貧無告者貴極公宰及歸田里見故交遺民意
驩如也厥後羣公多先物故而王獨享壽考以令名終
斯固保身之有道而始終不倦可謂盛也已今陛下追
惟創業之艱顯揚刻銘使播不朽豈獨蓋覆湯氏之子

孫蓋以昭揚先帝之功德而垂萬世也是用備著其事而獻銘曰於昭上帝視下孔仁降聖儲才相茲兆民民之顛隳俾聖康之復俾賢臣佐而襄之有元既衰天實厭亂篤生高皇拯綏大難龍奮於潛八極晦冥英傑如雲翼之以升惟東甌王既智且武灼知天命早識真主衆方夢夢未決所從獨斷不疑委身效忠臣或擇君挾策千里生於帝鄉其祉孰似寶劍雕戈折衝四方如虎如貔我武維揚披淮濟江以作京邑京邑既成皇業乃集

東過偽吳坐鎮毘陵不騫不傾仗義為城皇德日宣遠
懷遐服王率之行勢若破竹既平姑蘇元惡就誅威鎮
東南暨於海隅乃清關隴乃平幽冀萬邦來同獻其琛
貝帝曰念哉勛我元勛爰啟土疆流慶後昆中山建侯
遂公大國貂冠金券繡裳赤舄海宇晏寧巍巍中華民
休田間穀粟絲麻王亦白髮燕嬉甲第伊誰致之天子
之賜天子有詔共樂太平文錦兼金侑以百朋內暨夫
人亦受寵錫璽書爛然觀者動色天實生材股肱聖皇

豐其第祿俾之壽康壽考令終孰與之同天子之明式
勸有功沒登王封從饗宗廟始卒無瑕其忠有耀昭哉
大明如日麗天載焯鴻勛以訓萬年

明名臣琬琰錄卷二

欽定四庫全書

明名臣琬琰錄卷三

明 徐紘 撰

黔寧昭靖王祠堂碑

王 景

德足以昭三辰勛足以靖四垂故能翕張皇猷揮霍幅員乘大化以控揣與天地而俱存生為人豪沒為明神理之常也是以先王叙功以作元祀也非為褒德顯忠蓋亦示神而明之之誼焉若馬援之於漢張仁愿之於

唐賽音迪延齊之於元其功烈在人千載猶如一日語云大功必百世祀茲其近之有若黔寧昭靖王之茂實比之數公實有過焉尸而祝之斯古道也夫聖王作而大命集必生應昂降嶽之佐以間其休以道相我家邦是豈偶然而已哉按王諱英字文英姓沐氏鳳陽之定遠人元季天下難作王在童穉喪所怙恃時皇上龍飛鳳陽往拜於門上奇而育之既長機敏過人數從征伐終日侍側無戲色亦無惰容弘量孝恭出於天性上益

奇之滋欲試以事壬寅授帳前都尉出鎮鎮江緯有聲
績甲辰除廣武衛親軍指揮軍府肅然尋加昭勇大將
軍廣信衛指揮使軍事益律戊申春正月上既即皇帝
位改元洪武既定鼎命王從征福建禽元平章陳友定
三月復命王往鎮建寧三郡三年陞鎮國將軍僉大都
督府事四年陞榮祿大夫同知大都督府事時天下兵
樞交壅治出聲生稱上意旨中宮尤屬望焉九年乘傳
繇陝右抵熙河市德澤康遠人事有不便更張以聞明

年副寧河王總大兵征番部西渡黃河略川藏耀兵崑崙轉戰千里俘獲萬計班師論功封西平侯開國輔運推誠宣力武臣偕仍榮祿大夫勛柱國食祿二千五百石賜鐵券勛有盟府若曰朕昔子汝無異汝父汝今世有茲爵守乃宗祧以責乃祖父無忘朕命敬之哉又明年八月拜征西將軍將兵征西番降元萬戶奇實嘉三副使舒多爾濟阿溫都爾人卒二萬雜畜三十餘萬平朶甘納琳七站地數千里十三年以陝西兵征和林元

國公托和齊等畧以集乃渡黃河回賀蘭涉流沙偵報
去穹廬五十里王分為四翼自以驍勇衝其中堅銜枚
夜薄其營托果齊和卓全部皆降明年引兵出古北口
襲公主山長寨平四郡過驢駒河鹵知院李宣還京副
征南將軍統兵征雲南繇辰沅出羅鬼攻普定下之攻
普安又下之轉戰而前元梁王巴扎喇烏爾密以司徒
平章達哩瑪軍曲靖會大霧咫尺不辨兵壓白石江兩
軍相望征南欲濟王曰我軍遠來利在速戰然步卒未

集不若以計破之乃陳兵陽若渡者遣其兵從上流濟單山出其陣後為疑兵元軍見之陣動王麾軍泗水元軍亦卻陣我師既成列鎧仗鮮明彼皆奪氣大戰自辰至晡蹀血膏野士率鐵騎撞之出而復入生擒達哩瑪元兵大敗俘二萬人僵屍相屬乘勝蹙之勢若拉朽梁王棄城走自殺收其金寶列衛屯守諸部皆納款唯大理不下王率兵攻之段世據龍尾關關險王分一軍夜從間道登點蒼山襲其背黎明王擐甲執兵亂流攻關

關不守薄其城遂攻之城潰擒世永昌鶴慶會川皆平
間使下車下緬不浹十辰雲南底定夏王與征南分兵
東平烏蠻餘寇諸部謂王師東下復叛餘孽二十餘萬
圍雲南城幾不支王聞以銳師萬人馳救之遂拔營宵
遁時曲靖永昌皆失守王次第復平之事聞詔征南班
師王留鎮二十一年春平摩沙勒斬首千餘級三月緬
思倫發以三十萬衆寇定邊東川廣西往往遙應之王
率諸衛兵三萬禦之尅日會戰蠻用象王分兵軍為三

令曰聞吾砲聲大衆齊入初風從賊來砲發風反助順
乘風縱砲象皆股慄三軍夾擊之聲震山谷殺其首將
乃斯郎等蠻師大奔斬獲萬餘人盡獲其象馬軍實思
倫發遂附秋七月東川平冬十月廣西平誅其部長擒
獲五千餘人明年平越阿資冬朝京師錫宴奉天殿賜
金銀楮幣繒絲以萬計尋還鎮上慰曰汝在鎮朕無西
南之憂二十四年阿資復叛王親擊之有詔命王還鎮
以僉都督何福為平寇將軍討之阿資來降秋遣使招

八百八百八貢明年夏王薨於正寢軍民罷市巷哭訃
聞上哭之慟追封黔寧王謚昭靖王鎮十年初內訌外
攘人卒流亡內無宿儲外絕餉運王分軍墾田九十七
萬畝且耕且戰招撫攜貳設賢納士不吝賚予民始知
有生雖連歲用師而陽春煦育之意常寓於霜露水霰
之中遐邇曾聞皆覩天日山川草木滋生懋豫與嘉賴
之其功德之盛古所未有也民夷念王不置合辭請於
朝廷建祠報可俾王之胤子今西平侯纂其任從民望

也又按祭法古之通祀者曰法施於民曰以死勤事王
兼而有之載祀百世此其肇歟祠作於薨之後二年十
月乙未成於明年六月己卯凡為楹若干行馬列戟不
侈不踰遵憲章也既成享咸請記於石以垂無極因作
迎享送神之詩俾歌以樂焉大明麗天萬國明赤符飛
騰策六丁惟王翊運天降精身薄日月騎斗衡坐張天
弧檻撓搶助帝馭伐基隆平氣壓崑崙滄溟出入星
緯無留行勁涉滇海縻長鯨長鯨既殲波浪腥龍蛇走

陸殺氣橫噓陽吹陰孰敢搜文經武緯光晶熒手揭元
會歸虞廷上騎箕尾為列星帝錫侈封王黔寧河山帶
礪分漢明堂堂遺像夾兩楹神光夜夜飛爽靈肝鑿布
寫通杳冥婪麗颯沓從兩旌倏焉如雲搏紫清八衡鏘
然韻流鈴春秋報事垂千齡

安陸侯黔國威毅吳公神道碑銘

有序

劉三吾

上之洪武二十六年冬十月二十九日安陸侯吳公薨

於雲南軍中計聞上為之震悼輟朝明年春正月晦匿
車至龍江遣官祭奠賜宅兆鍾山之陰翼日詔禮曹定
議追封黔國公諡威毅其葬之二月二十二日駕出太
平門高岡望祭既襄事之三年洪武之二十八年冬十
月己亥皇上御奉天門以工部奏公碑已具惟文未有
勅詞臣三吾等文之鑱諸石焉臣職在揚厲不敢控詞
謹按其狀叙而銘之公諱復字伯起姓吳氏世廬州合
肥人貴由公始曾大父伯七公追封句吳子妣嚴氏句

吳子夫人大父省三公諱虎贈昭勇將軍親軍指揮使
追封保信伯妣朱氏保信伯夫人父萬一公諱海贈鎮
國上將軍僉大都督府事追封安陸侯妣耿氏安陸侯
夫人公生而沉鷺少言笑勇畧過人當元季宇內幅裂
羣雄蠱起念不能坐受魚肉必有真主方得拔迹至正
甲午首自梁縣仗劔謁今上於淮右上察其底裏無他
俾領前驅克滁州下湯泉六合等寨乙未夏六月從龍
濟江取采石太平繼當句容溧水丙申春二月破臺中

丞曼濟哈雅水寨進攻臺城功先諸將授管軍總管調之鎮江丹陽金壇兵至即下丁酉三月拔元帥擊江陰無錫下之還守常州戊戌夏四月姑蘇張士誠軍奄至致死爭公躍馬手矛追奔之己亥四月九月十月連攻士誠軍於高橋太湖於常州庚子夏五月破常熟西門辛丑夏四月張盛氣取償所喪敗於太湖冬十有一月又敗於長興俘斬五千餘張憤屢歟癸卯春三月悉衆圍劉福通於安豐公隨駕往擊率先陷陣大崩其軍俘

獲士馬資仗無算嗣是張為之奪氣矣甲辰春二月領
戰艦哨江敗敵於黃山殺傷過當三月從徐公今中山
王圍廬州五閱月未下手鎬大呼先登極敵樓兒張前
銳禽其渠帥連士馬遂克之時常公今開平王已南定
荆湖有旨授公指揮同知振武衛鎮沔陽元同僉任亮
者柵安陸擁兵肆薙五月開平總大軍復襄漢公將其
先鋒自沔倍道徑擣安陸州兵大潰生縛亮以歸上命
留鎮其地威愴德懷款附日至薙荆秦宇公私舍樓堞

隍塹糧儲甲仗無不畢具兵民胥賴焉戊申正月上即
皇帝位國號大明改元洪武其秋拔麻張寨洪山冬十
月克汝州魯山以功直授懷遠大將軍同知安陸衛指
揮二年春正月取勛縣均州房州諸柵險以自豪者悉
就削平三年正月踣易文通寨擄偽官及寇三百餘二
月調征陝西定安州元大將庫庫特穆爾逆戰走之禽
李區二平章等官兵士七百餘駝馬七百二十蹄夏五
月征吐蕃克河州襲元豫王巴納王默色院使底西黃

河黑松林敗阿實克圖於窮荒乃還秋八月拔南鄭回安陸
冬十有一月受世襲之命四年夏五月從潁川侯平西
蜀五年夏四月從衛國公平九溪柿溪辰州諸蠻俘峒
酋沒則螭蠻三百餘秋八月帥各衛兵會王都督夾擊
散毛峒九月回本衛進官鎮國將軍僉大都督府事十
年授世襲昭勇將軍指揮使十一年從西平侯再征吐
蕃十二年振旅京師賜鐵券號開國輔運推誠宣力武
臣階榮祿大夫勛柱國爵安陸侯食祿二千石十三年

從鎮北平十四年從潁國公征雲南冬十一月破阿賈
勝土者月等寨十二月得普安城之十五年春正月破
西保阿驢等寨城水西守之夏五月破客里硬華楚硬
本岡硬等寨秋八月取關索嶺九月赴援盤關十六年
春正月克黑定苗寨秋八月克比納寨而舊病金創復
作駟聞亟遣尚醫醫之已無及竟薨於水西矣公自結
髮從軍三十餘年馬蹄所至由淮而浙汧漢窮梁雍以
西前後俘馘諸蠻峒七百四十有五招捕華楚硬等寨

三百有一戶四千七百有九往往冒險矢石體無完膚
平居同輩中語及征戰事一不自口其能至臨陣對敵
則氣機橫發是故所至無堅不潰無攻不克斯其樹立
之俊偉者也嗚呼天以我皇上大是一統再造斯世則
必篤生名將為之恢郭徐常兩王開之於前黜國諸賢
佐之於其間此其事業相望忠義所貫豈不與我國家
河山帶礪同萬億年無疆之休也哉公生至順辛未某
月某日薨之年春秋五十有三室采氏從封安陸侯夫

人男六人長曰傑試驍騎右衛指揮使襲封安陸侯次
曰佑曰儀曰偉曰倫曰重喜女六人長為齊王妃次納
贅譚信次適昌樂侯子智次適前軍都督子謹餘尚
幼公在普定買妾楊氏年甫十七當公殮時慟哭已即
沐浴更衣自經以死事聞上歎異久之錫封貞烈淑人
從公葬墓下仍旌異其門云銘曰聖皇受命龍興鳳陽
風雲慶會神靈效祥徐常兩王功臣第一繼有吳侯奮
自梁邑委質以來戮力輸忠繇淮而浙屢衄寇鋒振武

開衛汙陽駐節民資以綏兵藉之戰元有餘衆邈在西
垂公鼓其勇彼窘於追旋師未幾雲南四伐威風所暨
孰不震懾棹鞅之遙九圍半週一疾水西竟是弗瘳人
之蓋棺旋踵朽息公有哀褒於黔之國誰謂蠻姬以死
從公誰謂公死不磨者功惇史勒銘徵諸爾封爾後克
熾我銘孔壽

鞏昌侯陝國宣武郭公神道碑銘

有序

劉三吾

洪武二十年冬十有一月己亥皇上御奉天門工部侍郎臣秦達奏故鞏昌侯墓道之碑已具宜得文及時鐫之有旨翰林學士院製文臣三吾職在詞垣不敢以才學謏淺為辭謹按其世系功勛年爵次第而銘之臣聞天興聖代大有為之君必篤生瓌偉英勇之將與之會遇以輔成其大業雖人也實天也當元季主政不綱所在裂裳為旗荷矜為革草野自雄罔所適主時則今上皇帝龍興鳳陽天人合應有若中山開平兩公傑出其

間是固功無與儔矣其知所趨向先後䟽附厥有成蹟
若鞏昌侯臣郭子興者亦豈偶然哉子興世鳳陽人拳
勇有膂力善騎射自癸巳歲起兵首隸元帥郭某麾下
即知所以適主明年得滁州又明年得和州亦既從龍
濟江若采石若太平若溧陽溧水所嚮崩角義勇之聲
日以祿矣丙申三月隨大軍進拔臺城先登授管軍總
管繼陞統軍元帥攻圍常州身犯矢石晝夜不解衣甲
為生蟣蝨九閱月城始下被賞優渥載調克宣州江陰

宜興婺州安慶衢州勢劇破竹壬寅分兵之江西南昌
得其全城癸卯八月進克鄱陽彭蠡之戰海艘駢進戒
嚴所部人百其勇陳友諒計憾中流矢死人知天命有
歸矣甲辰春侍上親征湖廣武昌洒血馳戰多所斬獲
用屢功擢鷹揚衛指揮使簡在上心俾從中山王拔廬
州拔安豐率先陷陣大敗姑蘇張士誠為之奪氣其平
襄陽下衡州定澧州辰州轉而鞏高郵踣淮安拔浙西
湖州生困姑蘇往往裏創力戰中山王以公之勇功聞

陞鎮國上將軍大都督府僉都督吳二年正月改洪武
元年上即位有事關陝命領其軍進討中原搃守潼關
三年獻一迹不敢南移戍鞏昌招摩邇殘嚴戢部曲戎
西羌夷兩境帖然進封鞏昌侯方倚之永鎮西垂而溘
先朝露薨於家矣上為之震悼輟朝三日賻贈有加追
封陝國公諡宣武以洪武十七年冬十有二月日葬聚
寶山之原曾祖考某贈鎮國上將軍僉大都督府事護
國追封光山縣子妣某氏從封光山縣子夫人祖考某

贈驃騎將軍都指揮使追封汾陽伯妣趙氏從封汾陽伯夫人考某贈榮祿大夫同知大都督府事柱國追封鞏昌侯妣單氏從封鞏昌侯夫人配汪氏封鞏昌侯夫人皆由公貴貤恩子男四人長景儀卒五開次振次宗次官僧公生以某年某月某日薨以某年某月某日壽五十有四惟公自開國以來從龍上下盡瘁所事所至以英勇聞是故攻無不克戰無不勝視轉萬里之遠歷歲之久若堂奧之朝夕焉雖鋒矢交集饑渴不時咸不

避卹必盪殲渠兇歸報終事乃已其依日月之光仗雷
霆之威以恢拓疆宇勒勛西垂者亦人傑也哉詞臣揚
厲為職是宜有銘詞曰聖皇受命龍興鳳陽戡定禍亂
經畧封疆篤生武臣先後相望維陝國公實生帝鄉沉
鷙其勇鐵石其剛乘風慶雲依日月光旌麾所指敵摧
鋒芒底定東南載戢遐荒萬里之遠如在室堂生前封
侯式是鞏昌自後封公亦此西方聚寶之原不食之岡
佳城鬱鬱公所固藏詞臣載筆德音靡忘子孫善保奕

世流芳

定遠侯王弼追封三代神道碑銘

有序

劉三吾

國家當天造草昧之初爪牙輩出風雲慶會時則有草
萊之士為効其忠勇不二之節焉當功成治定之日慶
賞大行雨露濃郁時則受鐵券之封者人堅帶礪之盟
焉於是武臣定遠侯王弼受封有年矣乃洪武二十有
七年秋八月侯以其履歷事狀來請文於翰林學士劉

三吾某徒武不學義所當為每在人後今於公侯之還鄉者弼還鄉矣與造第者弼造第矣鈔錠金銀匹帛之駢蕃錫賚者弼亦受錫矣推貴生者之爵爵其三代已死者之考妣亦獲爵其光矣惟是片石之樹所以顯揚其親子孫所以當為者朝廷亦與為之弼既不如自愧又不能勇為傾遲之至今且三四年夫以弼之貴顯不後乎諸臣而誼當發揚者乃不克先乎諸臣三吾悲其言而閔其忠為叙其狀曰王氏之先世鳳陽定遠人高

曾祖妣考因兵興年幼失其名氏祖考四七公祖妣張氏考五五妣魏氏三代之親俱封定遠侯侯夫人兄十六公追封廣威將軍上騎都尉河南中護衛指揮使一門三世並受侯封朝廷於臣門無一之或遺臣於朝廷顧萬分無一之少報况弼之生實當元政不綱羣雄蠭起之年大明真人誕為民生之日以至正丙申率其部下納款內附從龍濟江日益被遇竊自惟念弼之蠢愚語智不足以有謀語勇不能以陷陣屬當天心厭亂人

心思治是故兵行所至如涼颼之振槁葉不遺餘力破
竹之迎霜刃無所指手隨克雲川而得石棣攻蘭溪而
下金華諸暨及會稽龍舒鄂渚以至解洪城之受圍
戰鄱湖之鏖兵獲僞禁江應援安豐迤邐襄陽安陸秦
郵淮陰浙西湖州悉知如廟算所策遂階昭勇大將軍
驍騎右衛親指揮使時兩廣福建皆以平定則奉命從
大將軍今某公征進中原沂州益都東樓城轉而之濟
南浚儀河南潼關廣平彰德諸大郡先聲所至望風款

附乘此破竹之勢下幽燕真定關陝元之餘衆遂相繼
淪歿其察罕諾爾紅羅斷頭等山舉不戰自潰載進秦
國將軍僉大都府事洪武十一年調隸大將軍某公
西征討平羌戎推其部落生口橐駝羊馬俘獲無算進
右副總兵賜令號宣力武臣勛階官爵食祿二千石繼
平雲南二十年道出金山從大將軍受降納克楚二十
一年復從大軍征北師次補魚兒海獲元餘衆後宮妃
后等無遺餘我師方病渴而山額靈泉為之湧是捷也

非人力所及也實則天也時寵班芳効全軍勸動微臣
王弼亦獲哀褒至今陰山鐵侯虹光所貫永夜不息為
之銘曰天生真人龍興鳳陽一時牙爪皆在帝鄉奮勇
農畝拔迹我行維時我皇國運方昌百爾執事亦荷寵
光乘風雲會運籌策良旌麾所指敵摧鋒芒所攻者下
所嚮者降維侯定遠值時助勦念弗自保無所於藏率
其部曲從龍濟江濟江以來被遇異常首事雪川陣無
堅彊繼拔姑蘇寇無鷁張盛兵中原行營相望陳師幽

燕彼敵敢當紅羅之山窮追邊疆感踏河水衝冒雪霜
金城之進遂服殊方滇池之下遠過遐荒極北金山受
厥王降功於何有皇則不忘既賜之爵金匱永藏繇侯
世襲善善何長以侯就第富貴莫量墓有肖像翁仲馬
羊墓有穹碑金石文章人子所職事在顯揚金石文章
自爾玉堂河山帶礪與國無疆

明名臣琬琰錄卷三